


Ni Presidente  
Thomas S. Monson



# Dagiti Bendision ti Templo

*Ti templo ket mangipaay iti panggep para kadagiti biagtayo. Mangyeg daytoy iti talna kadagiti kararuatayo—saan a ti talna nga impaay dagiti tao no di ketdi ti talna nga inkari ti Anak ti Dios idi kinunana, “Ti talna ibatik kadakayo, ti talnak itdek kadakayo.”*

## **Iti templo mariknatayo a naasidegtayo iti Apo**

Panagkunak awan ti lugar iti lubong a pakariknaak a naas-asidegak iti Apo no di iti maysa kadagiti nasantuan a templona. Tapno ikkan kaipapanan ti maysa a daniw:

*Kasano ti kaadayo ti langit?  
Saan unay nga adayo daytoy.  
Kadagiti templo ti Dios,  
Adda laeng daytoy iti yantayo.*

Kinuna ti Apo:

“Saankayo nga agurnong iti kinabaknang nga agpaay kadakayo ditoy daga, a dadaelen ti sanga ken ti lati, ken takawan dagiti mannanakaw:

“Ngem agurnongkayo iti kinabaknang sadi langit, a di madadael ti sanga ken ti lati, ken di takawen dagiti mannanakaw:

“Ta no sadino ti yan ti kinabaknangyo, isu met ti yan ti pusoyo.”<sup>1</sup>

Kadagiti miembro ti Ti Simbaan ni Jesucristo dagiti Santo iti Ud-udina nga Aldaw, ti templo ti kasagraduan a lugar iti daga. Daytoy ti balay ti Apo, ket kas met laeng iti naisurat iti ruar ti templo nga agkuna, ti templo ket “kinasantuan iti Apo.”

## **Ti templo ket mangitag-ay ken mangitan-ok kadatayo**

Iti templo, maisuro ti napateg a plano ti Dios. Iti templo ti pakaaramidan dagiti agnanayon a katulagan. Ti templo ket itag-aynatayo, itan-oknatayo, agtakder a kas maysa a pagtaudan ti pammaregta a kitaen ti amin, ken itudona kadatayo ti dalan nga agturong iti celestial a gloria. Daytoy ti balay ti Dios. Amin a mapasasamak iti uneg ti templo ket makaitag-ay ken makapangayed.

Ti templo ket para kadagiti pamilia, maysa kadagiti kaindaklan a gameng nga adda kadatayo iti daytoy a biag. Ti Apo ket nalawag unay a makisasao kadatayo nga amma, a mangipakpakaammo nga addaantayo iti pagrebbengan a mangipateg kadagiti assawatayo iti amin a pusotayo ken mangipaay iti kasapulanda ken dagiti annaktayo. Impakaammona a ti kaindaklan a trabaho a maaramidatayo a kas nagannak ket maaramid kadagiti pagtaengantayo, ket dagiti pagtaengantayo mapagbalinda a langit no dagiti kallaysatayo ket mailantip iti balay ti Apo.

Ti pimmusayen a ni Elder Matthew Cowley, maysa a miembro idi ti Korum dagiti Sangapulo-ket-dua nga Apostol, ket insalaysayna iti naminsan maipapan iti

padas iti malem ti Sabado maipanggep iti maysa a lelong a nangkibin iti bassit nga apokona a babai iti panang-sarungkarna iti panagkasangay daytoy a nagturing—saan nga iti zoo wenno kadagiti pagsinean no di ketdi kadagiti arubayan ti templo. Addaan iti pammalubos ti agay-aywan iti arubayan, nagna dagiti dua a nagturing kadagiti dadakkel a ridaw ti templo. Insingasingna nga isagid ti apokona ti imana iti natibker a pader ket kalpasanna iti dakkel a ridaw. Kalpasanna kinunana a siaayat iti apokona, “Laglagipem nga iti daytoy nga aldaw sinagidmo ti templo. Iti maysa nga aldaw sumrekkanto iti unegna.” Ti sagutna iti bassit nga ubing ket saan a kendi wenno ice cream ngem maysa a padas a napatpateg nga amang ken agnanayon—maysa a panangbigbig iti pateg wenno panagdayaw iti balay ti Apo. Sinagidna ti templo, ket sinagid met ti templo isuna.

### **Ti templo ket mangisangbay iti talna kadagiti kararuatayo**

Bayat ti panangsagiddaytoy iti templo ken panangipategdaytoy iti templo, ti panagbiagtayo ket mangiladawan iti pammatitayo. Bayat ti ipapantayo iti nasantuan a balay, bayat ti pananglagiptayo kadagiti katulagan nga inaramiddaytoy sadiay, kabaellantayonto nga ibturan ti tunggal pannubok ken marimbawantayonto ti tunggal pannulisog. Ti templo ket mangipaay iti panggep para iti panagbiagtayo. Mangyeg daytoy iti talna kadagiti kararuatayo—saan a ti talna nga impaay dagiti tao no di ketdi ti talna nga inkari ti Anak ti Dios idi kinunana, “Ti talna ibatik kadakayo, ti talnak itdek kadakayo.” Saan koma nga agpulkok ti pusoyo, ken di agbuteng.”<sup>2</sup>

Adda dakkel a pammati kadagiti Santo iti Ud-udina nga Aldaw. Mangmangted kadaytoy ti Apo kadagiti gündaway tapno makita no tungpalentayonto dagiti bilinna, no surotentayonto ti dalan a sinurot ni Jesus iti Nazaret, no ayatentayonto ti Apo iti amin a puso, bileg, panunot, ken pigsatayo, ken ayatentayo dagiti padatayo a tao a kas iti bagbagitayo.<sup>3</sup>

Mamatiak iti proverbio nga “Agtalekka iti Apo iti amin a pusom, ket dika agtalged iti pannakaawatmo met laeng. Kadagiti amin a dalanmo isu ti bigbigem, ket isu iturongnanto dagiti desdesmo.”<sup>4</sup>

Kasta a kanayon; isu a kastanto latta a kanayon. No aramiddaytoy ti pagrebbengantayo ket agtalektayo a naan-anay iti Apo, punnuentayonto dagiti templona,

saan laeng nga iti panangaramid iti bukoddaytoy nga aramid nga ordinansa, ngem maaddaantayo pay iti pribilehio a panangaramid iti aramid nga agpaay kadagiti dadduma. Agparintumengdaytoy kadagiti sagrado nga altar tapno agbalintayo a proxy kadagiti panangilantip [sealing] a mamagkaykaysa kadagiti agassawa ken dagiti annak para iti amin a kinaagnanayon. Dagiti maikari nga agtutubo a lallaki ken agtutubo a babai nga agtawen iti 12 ket mabalindan ti ag-proxy para kadagiti natayen nga awanan kadagiti bendision ti pannakabuniag. Daytoy ti tarigagay ti Nailangitan nga Amatayo para kadakayo ken para kaniak.

### **Maysa a milagro ti napasamak**

Adun a tawen ti napalabas, maysa a napakumbaba ken napudno a patriarka, ni Brother Percy K. Fetzer, ket naawagan a mangted kadagiti bendision ti kinapatriarka kadagiti miembro ti Simbaan nga agnanaed iti likudan ti Iron Curtain.

Napan ni Brother Fetzer iti daga ti Poland kadagiti a narigat a panawen. Naserraan dagiti beddeng, ken awan ti umili a napalubosan a pumanaw. Nakipagkita ni Brother Fetzer kadagiti Santo nga Aleman a napupok sadiay idi nabaliwan dagiti beddeng kalpasan ti Maikadua a Gubat ti Sangalubongan ken nagbalin a paset ti Poland ti daga a pagnanaedanda.

Ti dadaulotayo kadagiti amin a Santo nga Aleman ket ni Brother Eric P. Konietz, a nagnaed sadiay a kaduana ti asawana ken dagiti annakna. Impaayan ni Brother Fetzer da Brother ken Sister Konietz ken dagiti inauna nga annak kadagiti bendision ti kinapatriarka.

Idi nagsubli ni Brother Fetzer iti Estados Unidos, timmawag ket dinamagna no mabalinna ti umay sumarungkar kaniak. Bayat ti panagtugawna iti opisina, nangrugi a nagsangit. Kinunana, “Brother Monson, bayat ti panangipatayko kadagiti dakulapko kadagiti ulo dagiti miembro ti familia a Konietz, nagaramidak kadagiti kari a saan a mabalin a maipatungpal. Inkarik kada Brother ken Sister Konietz a makapagsublidanto iti pagilianda nga Aleman, a saandanto nga agbalin nga adipen dagiti di mabaliwan a pangngeddeng dagiti manangrebbek a pagilian ken mailantipdanto a sangkamaysa kas familia iti templo ti Apo. Inkarik iti anakda a lalaki a makapagmisionto, ken inkarik iti anakda a babai a makapagkallaysanto iti nasantuan a templo ti

Dios. Ammom ken ammok a gapu kadagiti naserraan a beddeng, saandanto a maawat ti pannakaipatungpal dagidiay a bendision. Ania ti naaramidko?

Kinunak, “Brother Fetzer, am-ammoka unay tapno ammok nga inaramidmo laeng no ania ti tinarigagayan ti Nailangitan nga Amatayo nga aramidem.” Nagparintumengkami a dua iti abay ti tugawko ket nagkararangkami iti Nailangitan nga Amami, nga impasimudaagmi a naiteden dagiti kari iti napudno a familia maipapan iti templo ti Dios ken dadduma pay a bendision a maipapaidam ita kadakuada. Isu laeng ti makayeg iti milagro a kasapulanmi.

Napasamak ti milagro. Maysa a katulagan ti napirmaan iti nagbaetan dagiti dadaulo ti gobierno ti Poland ken dagiti dadaulo ti Federal a Republika ti Alemaniam, a namalubos kadagiti umili nga Aleman a napupok iti dayta a lugar a makapan iti Akinlaud nga Alemaniam. Immakar da Brother ken Sister Fetzer ken dagiti annakda iti Akinlaud nga Alemaniam, ket nagbalin nga obispo ni Brother Konietz iti ward a nagnaedanda.

Napan ti sibubukel a familia Konietz iti nasantuan a templo iti Switzerland. Ket asino ti presidente ti templo a nakakawes iti puraw a siaayat a nangkablaaw kadakuada? Awan ti sabali no di ni Percy Fetzer—ti patriarka a nangted kadakuada iti kari. Ita, iti pagrebbenganna a kas presidente ti Bern Switzerland Temple, inawatna ida iti balay ti Apo, kas pannakatungpal dayta a kari, ket inlantipna a sangkamaysa dagiti agassawa ken dagiti annak kadagiti nagannakda.

Iti kamaudiananna nagkallaysa ti agtutubo nga anak a babai iti templo ti Apo. Naawat ti agtutubo nga anak a lalaki ti awagna ket natungpalna ti maysa a full-time mission.

### **“Agkikitatayo iti templo!”**

Para iti sumagmamano kadatayo, ti biahetayo nga agturong iti templo ket ababa laeng a distansia. Para kadagiti dadduma, adda dagiti taaw a ballasiwen ken adu a kilometro ti daliasaten sakbay a makastrekda iti nasantuan a templo ti Dios.

Sumagmamano a tawen ti napalabasen, sakbay ti pannakaileppas ti maysa a templo iti South Africa, bayat ti idadar-ayko iti komperensia ti distrito iti Salisbury, Rhodesia idi, naam-ammok ti district president, ni Reginald J. Nield. Simmabat kaniak isuda nga agassawa ken dagiti napipintas nga annakna a babbai

bayat ti iseserrekkko iti kapilia. Inlawlawagda kaniak a nabayagen nga agur-urnongda iti kuarta ken agsagsaganada para iti aldaw a makapagbiaheda a mapan iti templo ti Apo. Ngem, anian, a kinaadayo unay ti templo.

Iti panaggibus ti miting, nagsaludsod kaniak dagiti uppat a napipintas nga annak a babbai maipapan iti templo: “Ania ti langa ti templo? Ladawan pay laeng ti nakitami.” “Kasanonto ngata ti riknami no sumrek-kami iti templo?” “Anianto ngata ti malagipmi unay?” Iti agarup maysa nga oras naaddaanak iti gundaway a nakisao kadagiti uppat a babbai maipapan iti templo ti Apo. Bayat ti ipapanawko nga agturong iti airport, nagpayapayda kaniak, ket kinuna ti kaubingan a babai, “Agkikitatayo iti templo!”

Kalpasan ti makatawen naaddaanak iti gundaway a nangkablaaw iti familia Nield iti Templo ti Salt Lake. Iti naulimek a siled a pagilantipan naaddaanak iti pribilehio a namagkaysa para iti kinaagnanayon, kasta met para iti panawen, kada Brother ken Sister Nield. Kalpasanna naluktan dagiti ridaw, ket dagiti napipintas nga annak a babbai, a tunggal maysa ket nakakawes iti natarnaw a puraw, simrekda iti siled. Inarakupda ti ina, kalpasanna ti ama. Adda lua kadagiti matada, ken panagyaman ket adda iti puspusoda. Kasla addakami iti langit. Mabalin a makuna ti tunggal maysa, “Ita familiakamin para iti kinaagnanayon.”

Daytoy ti nakaskasdaaw a bendision nga agur-uray kadagiti umay iti templo. Sapay koma ta tunggal maysa kadatayo ket agbiag a maikari, nga addaan kadagiti nadalus nga ima ken natarnaw a puspuso, tapno iti kasta masagid ti templo dagiti biagtayo ken dagiti pamiliatayo.


Kasano ti kaadayo ti langit? Paneknekak a kadagiti nasantuan a templo saan a pudno nga adayo—ta kadagitoy a sagrado a lugar nga agsabat ti langit ken daga ken pangpangtedan ti Nailangitan nga Amatayo kadagiti annakna kadagiti kaindaklan a bendisionna.

#### **DAGITI NAGADAWAN**

1. Mateo 6:19–21.
2. Juan 14:27.
3. Kitaen iti Mateo 22:37–39.
4. Dagiti Proverbio 3:5–6.

© 2010 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/09. Pannakaanamongna a maipatarus: 6/09. Pannakaipatarus ti *First Presidency Message, October 2010*. Ilokano. 09370 864

**Ni Presidente Boyd K. Packer,**  
Presidente ti Korum dagiti  
Sangapulo-ket-dua nga Apostol



# Ti Nasantuan a Templo

*Kadagiti templo, dagiti miembro ti Simbaan a mamagbalin iti bagbagida a maikari ket mabalinda ti makiraman iti katan-okan kadagiti panangsubbot nga ordinansa a naipaltiingen iti sangkataw-an.*

## **Kadagiti templo mabalintayo ti makiraman iti katan-okan kadagiti panangsubbot nga ordinansa**

Adu dagiti gapu no apay a nasken a tarigagayan ti maysa a tao a mapan iti templo. Uray ti akinruar a langana ket kasla ipakpakitana dagiti naespirituan unay a panggepna. Dagitoy naespirituan a panggepna ket ad-adda pay a makita iti uneg dagiti didingna. Iti ngatuen ti ridaw iti templo ket makita ti pamadayaw a “Holiness to the Lord [Kinasantuan iti Apo].” No sumrekka iti ania man a naidaton a templo, addaka iti balay ti Apo.

Kadagiti templo, dagiti miembro ti Simbaan a mamagbalin iti bagbagida a maikari ket mabalinda ti makiraman iti katan-okan kadagiti panangsubbot nga ordinansa naipaltiingen iti sangkataw-an. Sadiay, iti maysa a sagrado a seremonia, ti maysa a tao ket mabalinda a maugasan ken mapulotan ken masursuruan ken ma-endow ken mailantip. Ket no naawattayon dagitoy a bendision para iti bagbagitayo, mabalintayo ti mangannong para kadagiti pimmusayen a di nakaawat kadagitoy a bendision. Kadagiti templo ket maannong dagiti sagrado nga ordinansa nga agpaay kadagiti sibibiag ken kasta met nga agpaay kadagiti natay.

## **Dagiti ordinansa ken seremonia ti templo ket simple, napintas, ken sagrado**

Ti naannad a panagbasa kadagiti nasantuan a kasuratan ket mangipakita a saan nga imbaga ti Apo ti amin a banag iti amin a tao. Adda sumagmamano a naituding a pakaikarian nga umuna a kasapulan iti panangawat iti sagrado nga impormasion. Maibilang dagiti seremonia ti templo iti daytoy a kategoria.

Saantayo a pagsasaritaan dagiti ordinansa ti templo iti ruar dagiti templo. Saan a kaano man naisangrat a ti pannakaammo kadagitoy a seremonia ti templo ket limitado kadagiti manmano a napili nga akinrebbengto a mangpennek a saanto pulos masursuro dagiti dadduma ti maipapan kadagitoy. Kinapudnona, maisupadi daytoy. Addaan iti dakkel a panagkalikagum allukoyenmi ti tunggal tao nga agbalin a maikari ken agsagana para iti padas iti templo. Dagiti mapmapan iti templo ket nasuruandan iti maysa a pagulidanan: Iti maysa nga aldaw tunggal sibibiag a kararua ken tunggal kararua a nagbiagen ket maaddaandanto iti gundaway a makangngeg iti ebanghelio ken mangawat wenno magtallikud iti idiaya ti templo. No matallikudan daytoy a gundaway, ti panangtallikud ket nasken a pagrebbengan ti tao.

Simple dagiti ordinansa ken seremonia ti templo. Nangayed dagitoy. Sagrado dagitoy. Mailimed dagitoy tapno saanda a maited kadagiti saan a nakasagana. Ti kinamanangusisa ket saan a panagsagana. Ti napalalo a panagessem mismo ket saan a panagsagana. Ti panagsagana para kadagiti ordinansa ket iramanna dagiti umuna nga addang: pammati, panagbabawi, panagbuniag, kom-pirmasion, pannakaikari, kaadda iti husto a kananakem ken dignidad a maikari iti maysa a tao nga umay a naawis a sangaili iti balay ti Apo.

### **Mabalin dagiti maikari a sumrek iti templo**

Amin a maikari ken kualipikado iti tunggal wagas ket mabalinda ti sumrek iti templo, a sadiay mayam-ammoda kadagiti sagrado a seremonia ken ordinansa.

Apaman a maaddaanka iti pannakaawat iti kinapateg dagiti bendision ti templo ken para iti kinasagrado dagiti ordinansa a naaramid iti templo, agkedkedkanto nga agsaludsod maipapan kadagiti nangato a pagrukodan nga intuding ti Apo para iti iseserrek iti nasantuan a templo.

Nasken nga addaanka iti agdama a rekomenda ti templo tapno maawatka iti templo. Daytoy a rekomenda ket nasken a pirmaan dagiti umno nga opisial ti Simbaan. Dagiti laeng maikari ti nasken a mapan iti templo. Ti lokal a bishop wenno branch presidentmo ket addaan iti pagrebbengan nga agsaludsod maipapan iti bukodmo a pannakaikarim sakbay a maawatmo dagiti ordinansam iti templo. Daytoy nga interbyu ket napateg unay, gapu ta daytoy ket maysa a gundaway a panangamiris ti naordenan a katulongan ti Apo iti wagas ti panagbiagmo. No adda man maysa a banag a nagbiddutam iti biagmo, matulongannakanto ti bishop a mangrisut iti daytoy. Babaen daytoy a wagas, mabalinmo nga ibaga wenno mabalin a matulonganka a mangpatalged iti pannakaikarim a sumrek iti templo babaen ti pananganamong ti Apo.

Ti interbyu para iti rekomenda ti templo ket sililimed a maaramid iti nagbaetan ti bishop ken ti maseknan a miembro ti Simbaan. Ditoy mapagsaludsodan ti miembro kadagiti pangsukisok a saludsod maipapan iti bukodna nga ugali, pannakaikari, ken kinapudnona iti Simbaan ken kadagiti opisial daytoy. Nasken a paneknekan ti tao nga isu ket nadalus iti dayaw ken agtungtungpal iti Word of Wisdom, agbaybayad iti naan-anay nga apagkapullo, agbibiang a maitunos kadagiti pannursuro ti Simbaan,

ken saan a makikappeng wenno makipagrikna kadagiti kimmallilis a grupo. Naibilin iti bishop a ti pannakailimed ti panangimaton kadagitoy a banag iti tunggal tao a mainterbyu ket napateg unay.

Dagiti maawat a sungbat kadagiti saludsod ti bishop ket gagangayto a mangpatalged iti pannakaikari ti tao nga umawat iti rekomenda ti templo. No ti aplikante ket saan nga agtungtungpal kadagiti bilin wenno adda maysa a banag a di pay narisut maipapan iti biagna a nasken a maurnos, kasapulan nga ipakitananto ti pudno a panagbabawi sakbay a maikkan iti rekomenda ti templo.

Kalpasan ti panangiturong ti bishop iti kasta nga interbyu, mainterbyuka met ti stake president sakbay a maawatmo dagiti ordinansam iti templo.

### **Ti panangisuro iti templo ket babaen kadagiti simbolo**

Sakbay ti ipapan iti templo iti umuna a gundaway, wenno kalpasan ti adu a gundaway, mabalin a matulonganka a mangamiris a ti panangisuro iti templo ket maar-aramid iti wagas a pakaaramatan dagiti simbolo. Ti Apo, ti Nalaing a Mannursuro, ket nangted iti kaaduan a pannursurona iti kastoy a wagas:

Ti templo ket maysa a naindaklan a pagadalan. Balay daytoy a pagsursuruan. Mapagtalinaed ti aglawlaw kadagiti templo tapno mayannnatup daytoy iti panangisuro kadagiti banag a naespirituan unay. Ti pimmusayen a ni Elder John A. Widtsoe iti Korum dagiti Sangapulo-ketdua nga Apostol ket maysa idi a nalatak a presidente ti unibersidad ken am-ammo nga eskolar iti sangalubongan. Addaan isuna iti dakkal a panagraem iti aramid iti templo ket kinunana iti maysa nga okasion:

“Dagiti ordinansa ti templo ket iramanna ti sibubukel a plano ti pannakaisalakan, kas kanayon nga isursuro dagiti dadaulo ti Simbaan, ken ilawlawagda dagiti banag a narigat a maawatan. Awan ti panangballikug wenno panangbalbaliw kadagiti pannursuro iti templo iti dakkal a plano ti pannakaisalakan. Ti mainaig iti pilosopia a kinaan-anay ti endowment ket maysa kadagiti dadakkal nga argumento para iti kinapudno dagiti ordinansa ti templo. Maysa pay, daytoy a kinaan-anay ti panangamiris ken panangilawlawag iti plano ti Ebanghelio, ket mamagbalin iti panagrakbab iti templo a maysa kadagiti kasamayan a wagas ti panangpasantak iti lagip maipanggep iti sibubukel nga istruktura ti Ebanghelio” (Temple Worship,” *Utah*



*Genealogical and Historical Magazine*, Abr. 1921, 58).

No mapankanto iti templo ket malagipmo a ti pannursuro ket babaen kadagiti simbolo, dikanto kaano man makapan iti umno nga espiritu a saanka a makaadayo nga awanan iti napalawa a pannirigam, a mariknam ti ad-adda a pannakaitan-ok, nga addaanka iti dimmakkel a pannakaammom maipanggep kadagiti banag a naespirituan. Nakangayngayed ti plano ti panangisuro. Naparegta daytoy. Ti Apo a Mismo, ti Nalaing a Mannursuro, ket insurona a kanayon dagiti disipulona babaen kadagiti pangngarig—maysa a wagas ti panangisao a mangibagi kadagiti banag nga usaren dagiti simbolo ta no saan ket mabalin a narigatda a maawatan.

Ti templo a mismo ket agbalin a maysa a simbolo. No nakitamon ti maysa kadagiti templo iti rabii, a naan-anay ti pannakasilawna, ammom a makaawis unay a buya daytoy. Ti balay ti Apo, a napalawlawan iti silaw, nga agtaktakder iti kasipngetan, ket agbalin a simbolo ti bileg ken ti pammaregta ti ebanghelio ni Jesucristo nga agtaktakder a kas pagtaudan ti pammaregta iti maysa a lubong a lumlumned nga umadayo a mapan iti naespirituan a kinasipnget.

Apaman a makastrek iti templo, sukutam dagiti gagangay a pagan-anaymo iti puraw a kawes ti templo. Maaramid daytoy a panagpelles wenno panagsukat iti pagan-anay iti dressing room, a pangtedan iti tunggal tao iti maysa a locker ken iti maysa a pribado a kuarto a pagpellesan iti bado. Iti templo ti pagulidanan ti kinaemma wenno kinadalus ket siaannad a mapagtali-naed. Iti panangidulinmo iti pagan-anaymo iti locker, panawam dagiti pakarikutam ken pakaseknam ken pakaburiboram sadiay a karaman dagitoy. Rumuarka iti daytoy pribado a bassit a pagkawesan a nakakaweska iti puraw, ket mariknam ti pannakikaykaysa ken rikna ti panagpapada, gapu ta amin a tao iti aglawlawmo ket agpapadakayo iti pagan-anay.

### **Ti kallaysa iti templo ti kangrunaan nga ordinansa iti templo**

Dakayo nga agplano nga agkallaysa iti templo ket mabalin a kayatyo a maammuan no anianto ti mapasamak. Saanmi a dakamaten dagiti balikas ti ordinansa ti panangilantip (kallaysa) iti ruar ti templo, ngem mabalinmi nga iladawan ti siled a pagilantipan a kas napintas iti pannakaaramidna, naulimek ken natalna

iti espiritu, ken naaramid a nasantuan babaen ti sagrado nga aramid a maan-annong sadiay.

Sakbay a mapan dagiti agassawa iti altar para iti ordinansa ti panangilantip, pribilehio ti mangimatmaton [officiator] ti mangted, ken dagiti agtutubo nga agassawa ti umawat, iti balakad. Dagitoy ti sumagmamano kadagiti kapanunotan a mabalin a mangngegan dagiti agtutubo nga agassawa iti daytoy nga okasion.

“Ita nga aldaw ti aldaw a panagkallaysayo. Nalapunoskayo iti rikna ti panagkallaysayo. Nabangon dagiti templo a kas santuario para kadagiti nga ordinansa a kas iti daytoy. Awantayo iti lubong. Saan a mayaplikar ditoy dagiti banag a mainaig iti lubong ken nasken a saanda nga aringan ti ar-aramidentayo ditoy. Rimmuartayon iti lubong tapno umay iti templo ti Apo. Agbalin daytoy a kapatgan nga aldaw iti biagyo.

“Nayanakkayo, naawis iti daga, babaen kadagiti nagannak a nangisagana iti mortal a tabernakulo para iti pagnaedan ti espirituyo. Nabuniaganen ti tunggal maysa kadakayo. Ti panagbuniag, maysa a sagrado nga ordinansa, ket mangisimbolo iti panangdalus, mangisimbolo iti ipapatay ken panagungar, mangisimbolo iti isasang-bay iti baro a panagbiag. Iramanna ti panagbabawi ken pannakaugas dagiti basol. Ti sakramento ti Pangrabii ti Apo ket panangpabaro iti katulagan iti panagbuniag, ken kabaelantayo, no agbiagtayo para iti daytoy, a mapagtali-naed ti pannakaugas dagiti basoltayo.

“Sika, ti nobio, ket naordenan iti priesthood. Immuna a naited kenka ti Aaronic Priesthood ket mabalin a dimmur-aska babaen dagiti amin nga opisina daytoy—deacon, teacher, ken priest. Kalpasanna dimteng ti aldaw a nagbalinka a maikari nga umawat iti Melchizedek Priesthood. Dayta a priesthood, ti nangatngato a priesthood, ket mailawlawag a kas priesthood a maibatay iti kasantuan nga urnos ti Dios, wenno ti Nasantuan a Priesthood a maibatay iti urnos ti Anak ti Dios (kitaen iti Alma 13:18; Helaman 8:18; Doktrina ken Katulagan 107:2–4. Naikkanka iti maysa a takem iti priesthood. Maysaka itan nga elder.

“Immawaten ti tunggal maysa kadakayo iti endowmentyo. Iti dayta nga endowment naawatyo ti karbengan ti agnanayon a potensial. Ngem amin dagitoy a banag, iti maysa a kaipapanan, ket pangyuna ken pangisagana iti yaayyo iti altar tapno mailantip a kas agassawa para iti panawen ken para iti amin a kinaagnanayon. Agbalinkayo

itan a pamilia, nawaya nga agtignay iti panagparsua iti biag, tapno maaddaan iti gundaway babaen ti kinapasnek ken sakripisio a mangisangbay kadagiti annak iti lubong ken mangpatanor kadakuada ken mangpadur-as kada-kuada a sitatalged iti panagbiagda iti daytoy a biag; tapno makita ida nga umayda iti maysa nga aldaw, a kas iti yaayyo, tapno makiraman kadagitoy sagrado nga ordinansa ti templo.

“Umaykayo a sitatallugod ken nakedngankayon a maikari. Ti mangawat iti tunggal maysa iti katulagan ti panagkallaysa ket maysa a dakkel a pagrebbengan, maysa nga addaan kadagiti bendision a di mabubos.”

### **Ti bileg a pangilantip ket mamagreppeng iti daga ken iti langit**

No maawatan nga agpada ti pakasaritaan ken ti doktrina ti aramid iti templo, nasken a maawatantayo no ania ti bileg a pangilantip. Nasken nga iladawantayo iti panunottayo, uray iti maysa laeng a tukad, no apay a dagiti tulbek ti turay a pangaramat iti bileg a pangilantip ket napateg unay.

“Ket idi ni Jesus immay kadagiti disso ti Cesarea ni Filipino, inimtuudna kadagiti adalanna, a kinunana, Siasino ti Anak ti tao iti panagkuna dagiti tao? . . .

“Ket simmungbat ni Simon Pedro, ket kinunana: Sika ti Cristo, ti Anak ti Dios a sibibiag.

“Ket simmungbat ni Jesus ket kinunana kenkuana: Nagasatka, Simon, anak ni Jonas; ta saan a ti lasag wenno dara, ti nangipaltiing kenka no di ket ni Amak nga adda sadi langit.

“Ket siak kunak met kenka, a sika Pedroka; ket iti daytoy a bato bangonekto ti iglesiak; ket dagiti ruangan ti impierno saandanto nga agballigi kenkuana.

“Ket itdekto kenka dagiti tulbek ti pagarian ti langit; ket ti aniaman a galutamto ditoy daga, magalutanto idiy langit; ket ti aniaman a warwaramto ditoy daga mawarwaranto idiy langit” (Mateo 16:13, 16–19).

Ni Pedro ti agiggem kadagiti tulbek. Ni Pedro ti agiggem iti bileg a pangilantip, dayta a turay nga addaan iti bileg a mamagreppeng wenno mamaglantiip iti daga wenno mangwarwar iti daga ken kastanto met iti langit. Adda dagita a tulbek iti Presidente ti Simbaan—iti propeta, mammadto, ken mammaltiing. Dayta sagrado a bileg a pangilantip ket adda iti Simbaan itan. Awanen ti ibilang pay nga addaan iti nasagsagraduan a panagutob

dagiti makaammo iti kinapateg daytoy a turay. Awanen ti ad-adda pay a maitalimeng. Adda sumagmamano laeng a lallaki a naikkan iti daytoy bileg a pangilantip iti rabaw ti daga iti naituding a panawen—iti tunggal templo adda dagiti kakabsat a lallaki a naikkan iti bileg a pangilantip. Awan ti makaala iti daytoy malaksid ti propeta, mammadto, ken mammaltiing ken ti Presidente ti Simbaan ni Jesucristo dagiti Santo iti Ud-udina nga Aldaw.

Kinuna ti Propeta Joseph Smith a masansan a masalud-sod kenkuana, “Saankami kadi a maisalakan a dikami aglasat iti amin kadagidiay nga ordinansa, ken dadduma pay?” Isungbatko, Saan, diyo maawat ti pakabuklan ti pannakaisalakan. Kinuna ni Jesus, ‘Idiy balay ni Amak, adda adu a pagianan, ket innak isaganaankayo iti pagianan.’ [Kitaen iti Juan 14:2. *Ti balay ditoy a nadakamat* ket nasken koma a naipatarus iti pagarian; ket asino man a tao a maitan-ok iti kangatuan a mansion ket nasken nga agtungpal iti celestial a linteg, ken kasta met iti sibubukel a linteg” (iti *History of the Church*, 6:184).

### **Ti aramid iti templo ti pagtaudan ti naespirituan a bileg**

Dagiti templo ti mismo a pannakasentro ti naespirituan a pigsa ti Simbaan. Nasken a mangnamnamatayo a ti kabusor ket padasennanto ti makibiang kadatayo a kas Simbaan ken iti tunggal maysa kadatayo bayat ti panagkagumaantayo a makiraman iti daytoy sagrado ken naparegta nga aramid. Mangisangbay ti aramid iti templo iti adu a panagkedked gapu ta daytoy ti pagtaudan ti dakkel a naespirituan a bileg kadagiti Santo iti Ud-udina nga Aldaw ken iti sibubukel a Simbaan.

Iti pannakaidaton ti panuli a bato ti Templo ti Logan Utah, inaramid ni President George Q. Cannon, nga adda idi iti Umuna a Panguluen, daytoy a sao:

“Tunggal pamuon a bato a maipan para iti maysa a Templo, ken tunggal Templo a maileppas a mayanurot iti urnos ti Apo ket nangipaltiing iti nasantuan a Priesthoodna, mangpakapsut iti bileg ni Satanas iti daga, ken mangpapigsa iti bileg ti Dios ken Kinadiosan, mamagtignay iti langit a sibibileg para kadatayo, umawag ken mangyeg kadatayo kadagiti bendision dagiti Agnanayon a Dios, ken dagiti agnanaed iti sidongda” (iti “The Logan Temple,” *Millennial Star*, Nob. 12, 1877, 743).

No dagiti miembro ti Simbaan ket maburiboran wenno no madagsenanda a mangpanunot kadagiti napateg unay

a pangeddeng, gagangay laeng a banag para kadakuada ti mapan iti templo. Nasayaat daytoy a lugar a pangipanan kadagiti pakaseknantayo. Iti templo makaawattayo iti naespirituan a pannirigan. Sadiay, kabayatan ti serbisio iti templo, addatayo iti “ruar ti lubong.”

No dadduma dagiti panunottayo ket madagensenan unay kadagiti problema ken adu unay a banag ti aggigidan a makasapul iti atensiyantayo ket saantayo a makapagpanunot a nasayaat ken makakita a nalawag. Iti templo mapagpag ti tapok ti pakariribukan, ti angep ken ti kinakudrep kasla agpangatoda, ket “makitatayo” dagiti banag a ditay nakita idi ket makabiroktayo iti wagas a pakarisutan dagiti parikuttayo a saantayo nga ammo a nasapsapa.

Ti Apo bendisionanntayto bayat panagaramidtayo iti aramid ti sagrado nga ordinansa kadagiti templo. Dagiti bendision sadiay ket saanto a limitado iti panagserbitayo iti templo. Mabendisionantayonto kadagiti amin nga aramidtayo.

### **Dagiti aramidtayo iti templo ti mangsalaknib ken mangsaluad kadatayo.**

Awan ti aramid nga ad-adda a makasaluad iti daytoy a Simbaan no di ti aramid iti templo ken ti panagsukisok iti pakasaritaan ti familia a mangsupsuporta iti daytoy. Awan ti aramid nga ad-adda pay a makapadalus iti espiritu. Awan ti aramid nga ar-aramidentayo ti makaited kadatayo iti dakdakkal a bileg. Awan ti aramid nga agkasapulan iti nangatngato a pagrukodan ti kinalinteg.

Dagiti aramidtayo iti templo ti mangsalaknib ken mangsaluad kadatayo, agpada a kas maysa a tao ken kas tattao.

Isu nga umaykayo iti templo—umaykayo ken dawateno dagiti bendisionyo. Sagrado daytoy nga aramid.

*Naibatay manipud iti Preparing to Enter the Holy Temple (booklet, 2002)*